


Noticia
Transparente
di Gobierno

ISLA ONLINE

Diahuebs 22 Februari 2024

Email: IslaOnline@gobierno.aw Tel: 528-4952

ARTE DI MURAYA SAN NICOLAS



Gabinete Wever-Croes



Inauguracion di Plaza Comercio

VISION DI GABINETE WEVER-CROES TA PA REBIBA Y REVITALISA CENTRO DI ORANJESTAD



Diamars atardi, Prome Minister Evelyn Wever-Croes tabata presente na e desvelo y nombracion oficial di e plaza nobo, Plaza Comercio, den curason di Oranjestad. E proyecto aki ta un simbolo poderoso di revitalisacion y progreso y un testimonio di Gobierno su dedicacion na mehoracion continuo y sostenibilidad.

Prome Minister a expresa cu e esfuersonan pa revitalisa e capital di Aruba ta refleha e compromiso profundo, celebrando e herencia cultural y alaves dirigi nos cara na un futuro mas prospero y sostenibel. E plaza nobo ta representa no solamente un espacio pa recreacion y encuentro pa nos comunidad y bishitantenan, pero tambe un paso padilanti den e vision pa un Oranjestad mas vibrante.

E aña aki, Oranjestad ta celebra 200 aña, marcando dos siglo di historia, crecimiento y desaroyo. E historia di Oranjestad ta uno di resiliencia, innovacion y e espirito cultural cu tur ciudadano mester sigui cultiva y celebra.

Prome Minister a indica, cu e fondonan cu tabata tin disponibel

pa e proyecto aki, tabata limita, forsando esnan encarga pa bira mas creativo, mas responsabel cu fondo, y busca alternativanan pa por logra. Gobierno a compromete pa aloca recursonan na proyectonan cu ta contribui significativamente na bienestar di nos isla y su habitantenan, y e desvelo di e plaza nobo ta un excelente ehempel di con por logra metanan grandi, trahando duro cu dedicacion y un vision comparti.

"Mi ta gradici Minister Geoffrey Wever, cu tabata determina pa haci e proyecto aki exitoso.

Tambe na tur esnan cu a contribui na e proyecto di Plaza Comercio, desde e planificacion te na e ehecucion. E proyecto aki, ta un logro di nos tur y un regalo pa futuro generacionnan. Pa nos, e plaza nobo no ta solamente un espacio fisico, pero un simbolo di nos aspiracion pa un Aruba mas fuerte y mas conecta. Nos a compromete pa haci Aruba mas fuerte y mas resiliente despues di pandemia, nos no kier solamente "bounce back" pero tambe "bounce forward". Hunto nos por surpasa cualkier reto, y construi no solamente edificionan, pero un legado duradero di progreso. Cada paso dilanti ta un paso mas, pa un isla mas briyante", Prome Minister a expresa.



Prome Minister Evelyn Wever-Croes: PROCURADOR GENERAL NOBO PA ARUBA SRA. AMALIN FLANEGIN A WORDO PRESENTA OFICIALMENTE

Ta un orguyo pa wak un yiu di tera y un hende muhe den e posicion clave aki

Diahuebs ultimo, Aruba a cera conoci oficialmente cu e Procurador General nobo di Aruba sra. Amalin Flanegin y tambe dos hues nobo. Procurador General sra. Amalin Flanegin a wordo presenta durante un ceremonia solem y oficial presidi pa Presidente di Corte di Husticia sr. Mauritsz de Kort.

Durante e sesion aki nos Procurador General a haya e oportunidad pa comparti su vision y preocupacionnan y manera ta conoci di sra. Flanegin, esaki a wordo treci padilanti na un forma determina pero tambe comprometi. Durante e ocasion aki tambe Aruba a cera conoci cu dos hues nobo; Mr. Brandt y Mr. Pijenburg. Mr. Pijenburg ta trata casonan di impuesto.

Presente pa e ocasion aki tawata Su Excelencia Gobernador di Aruba Alfonso Boekhoudt, Presidente Parlamento di Aruba Edgar Vrolijk, Prome Minister Evelyn Wever-Croes, Minister di Husticia Rocco Tjon, y varios otro dignatario.

Prome Minister a expresa di ta hopi orguyoso cu Aruba tin un hende local y un hende muhe como nos Procurador General nobo. Sra. Flanegin tin tur capacidad y cualidad cu tin mester pa por guia nos Ministerio Publico aki na Aruba. Ministerio Publico ta un organo totalmente independiente. Gobierno no tin niun influencia den Ministerio Publico y Procurador General ta percura pa esey sigui asina.

“Den un comunidad chikito no ta facil y p’esey mas aun nos ta aprecia y nos ta respeta e determinacion cu sra. Flanegin ta demostra.”, Prome Minister a remarca.

Den nomber di Gobierno di Aruba, Prome Minister ta desea Mr. Brandt, Mr. Pijenburg, y nos Procurador General sra. Flanegin hopi exito. ■■■■







En conexión cu Dia Internacional di Lengua Materno

MINISTER MADURO TABATA PRESENTE NA E APERTURA DI E EXPOSICION "VISUALISANDO DICHO Y PROVERBIO"

Obranan di nos studiantenan artistico a sa di resalta durante e apertura aki

Diaranson anochi, rondona di creatividad y color, Minister di Cultura tabata presente na UNOCA Aruba pa asina presencia e obranan di arte di nos studiantenan artistico den cuadro di e exposicion "Visualisando Dicho y Proverbio".

Durante e anochi aki, e mandatario a dirigi algun palabra na tur esnan presente, poniendo énfasis riba e uzo di nos idioma Papiamentu, specialmente riba e importancia y e impacto di dominio linguístico di un lenga materno pa desaroya un sociedad pacífico y sostenibel. Sociedadnan multicultural manera Aruba, por existi danki na idioma, por medio di cual ta traspasa y conserva tradicionnan y culturanan na un manera sostenibel.

"Awenochi e arte verbal y e arte visual a uni pa asina nos por disfruta di e riquesa di nos Papiamentu y creatividad di nos studiantenan. Actualmente nos ta bibando den un mundo cu ta hopi visual, unda nos ta rondona di imagennan. Pa e motibo aki e ta un excelente idea pa combina e riquesa di nos lenga cu e poder di expresion visual, pa traspasa e historia, sabiduria y hasta un tiki humor pa nos futuro generacionnan. Traspaso di nos cultura ta haci cu esaki ta keda biba den generacionan nos dilanti. Cu e arte di pintura y lesando e dicho of proverbio nos ta experiencia e profundidad di locual esaki ta representa y ilustra. E bunita iniciativa aki por sigui inspira nos artistanan local pa promove Papiamentu por medio di uzo di nan creatividad. Nos idioma Papiamentu conoce varios dicho y proverbio. Nan ta parti di nos herencia cultural y ta e forma pa keda conecta cu nos pasado mientras nos ta mirando pa futuro." tabata palabranan di Minister Maduro durante su discurso.

E proyecto aki ta un proyecto di UNOCA Aruba conhuntamente cu Ministerio di Cultura, Ministerio di Educacion, Fundacion Lanta Papiamentu y UNESCO Aruba. Minister Maduro ta



gradici cada un pa e bunita iniciativa aki, pero specialmente nos artistanan, cu a visualisa e dicho y proverbionan pa tur esnan presente por admira. "Masha danki pa e bunita iniciativa aki cu ta enrikese nos patrimonio cultural Papiamentu y cu ta percura pa traspaso di cultura y conocementonan tradicional y unico di nos Pais. Cultura bo tin cu bib'e y bo participacion ta engrandece." tabata palabranan final di e mandatario na e ocasion aki. ■■■





GOBIERNO DI ARUBA A FIRMA UN ACUERDO CU PARKE NACIONAL DI ARUBA PA YUDA FUNDA UN ESTUDIO PA CONSERVACION Y MANTENCION DI WESTERN WETLANDS Y TAMBE PA EXPLORA E POSIBILIDADNAN PA CONSTRUI UN VISITOR CENTER



Minister di Turismo y Salud Publico sr. Dangui Oduber durante un conferencia di prensa a firma un acuerdo cu Fundacion Parke Nacional Aruba (FPNA) pa yuda funda un estudio pa conservacion y mantencion di western wetlands miho conoci como "Bubali Plas".

Minister Dangui Oduber ta anuncia un comienso di un bunita partnership entre ministerio di turismo, ministerio di naturalesa, Fundacion Parke Arikok Aruba (FPNA) y Tourism Product Enhancement Fund (TPEF) cu lo financia e estudio aki.

Algun tempo pasa FPNA a haci un presentacion na e ministerionan di turismo y di naturalesa, como tambe na board di TPEF caminda a presenta un masterplan pa future, pa proteha e areanan di nos sistema ecologico unda diferente parha, insecto y animalitosnan ta biba. Dr. Lawrence Jones-Walters duna un bunita presentacion di e tema "Nature inclusive transitions corporate strategy and accounts" unda a toca hopi punto informativo di areanan protehi na Aruba y cual ta e bestianan popular cu ta biba den esakinan. Minister Dangui Oduber tambe a menciona tocante e visitor center unda cu turista y local por bin disfruta di e naturalesa. Alaves, esaki lo crea un turismo nobo pa Aruba, cu lo enfoca ariba un "niche market" cu ta eco-turismo y sigur eta algo cu nos lo sigui traha ariba dje hunto cu e partnernan.

Western Wetlands Project

Research approach

René Henkens and Lawrence Jones-Walters, 21 February 2024



Director di FPNA, sr. Tyson Lopez, tambe a hiba palabra na e conferencia di prensa y a laga e siguiente mensahe pa pueblo di Aruba.

"Fundacion Parke Nacional Aruba como un organisacion di conservacion di naturalesa ta contento di por a firma un colaboracion cu TPEF pa asina cuminsa cu e Western Wetlands Baseline Assessment cu lo wordo ehecuta door di Wageningen University & Research", Tyson Lopez, CEO di Fundacion Parke Nacional Aruba ta comenta. "E assessment aki ta hunga un rol crucial den e determinacion di e balor di naturalesa den e Western Wetlands y tambe lo produci resultadonan importante cu lo duna conseho concreto di con pa conserva e areanan aki y alavez lo yuda cu conseho di con pa crea experiencianan sostenibel y transformacional den naturalesa pa bishitantenan especificamente na Saliña Bubali".

Pa finalisa, Minister Dangui Oduber kier yama danki na su colega Minister Arends pa e bon synergia y cooperacion pa e proyecto aki. Minister Oduber ta percurando pa un maneho di un turismo sostenibel caminda tin un balansa entre desaroyo y naturalesa. No por keda sin gradici tambe team di Fundacion Parke Nacional Aruba, board di TPEF, Dr. Lawrence Jones-Walters y tur otro persona cu ta y lo sigui traha ariba e proyecto aki.



**Gobierno di Aruba a decreta año 2024
como Año di Stabilidad y Prosperidad.**

**Esakinanan ta fundeshi cu e
generacionnan Arubiano prome cu nos
a bin ta preparando pa nos generacion.**

**Despues di e pandemia global di
COVID-19, nacionnan rond mundo a
encontra retonan sin precedente cu a
pone nan resiliencia y adaptabilidad na
prueba. Aruba, un perla den Caribe, a
sali di e periodo dificil no solamente
mas fuerte, pero tambe cu un vision y
compromiso renoba pa
Stabilidad y Prosperidad.**



MINISTER GEOFFREY WEVER A DUNA PRESENTACION DI SUSTAINABLE DEVELOPMENT GOALS NA ALUMNONAN DI COLEGIO FELIPE B. TROMP



E siman aki alumnonan di klassen 6 di Colegio Felipe B. Tromp a ricibi presentacion di e metanan di desaroyo sostenibel, e 'Sustainable Development Goals (SDGs)', duna door di Minister Geoffrey Wever. E proyecto aki a cuminsa aña pasa unda klassen 6 di scolnan basico ta haya presentacion pa yuda cu conscientisacion di kico e metanan di desaroyo sostenibel ta encera y con cada un di nos por yuda na logra e metanan.

Di un manera interactivo Minister Wever a splica e metanan di desaroyo sostenibel na e alumnonan. For di e alumnonan tabatin basta interes pa e topico.

E Metanan di Desaroyo Sostenibel ta consisti di 17 metanan riba cual paisnan ta traha pa alcanza den nan contexto nacional. E metanan ta: 1. Caba cu pobresa; 2. Caba cu hamber; 3. Salud y bienestar; 4. Enseñansa di calidad; 5. Igualdad di genero; 6. Awa limpi; 7. Energia limpi y economico; 8. Trabou decente y crecemento economico; 9. Innovacion y infraestructura; 10.



Reduci desigualdad; 11. Barionan y comunidadnan sostenibel; 12. Produccion y consumo responsabel; 13. Accion riba clima; 14. Bida bou awa; 15. Bida riba tera; 16. Paz, husticia y institucionnan formalisa; 17. Partnership pa logra e metanan.

Minister Geoffrey Wever ta manda un danki na Colegio Felipe B. Tromp pa e recepcion. ■■■

MINISTER GEOFFREY WEVER TA LANSA CREATIVE ENTREPRENEURSHIP WORKSHOP NA SAN NICOLAS




Diaranson ultimo a tuma luga e apertura oficial di e Creative Entrepreneurship Workshop na The Hub, San Nicolas. Minister Geoffrey Wever tabata tey presente pa asina duna inicio na esaki. Manera ja caba ta conoci cu parti di e vision di Minister Wever ta pa crea un Orange Economy na San Nicolas. E workshopnan aki ta parti di e esfuerso pa stimula localnan cu ta creativo y guia nan pa asina nan por logra habri nan negoshi pariba di brug y asina forma parti di e Orange Economy.

“Mi ta contento di wak un sala yen y tende caba algun ideanan creativo pa cu negoshinan na San Nicolas, Minister Wever a bisa.

Den e prome edicion di e workshop Dave Martinus di Action Coach a duna un splicacion amplio di con e ta pa habri un negoshi pero tambe kico tur esaki ta rekeri.

E programa di Workshops di Creative Entrepreneurship lo tuma luga over di un periodo di algun siman cu diferente sessionnan. Proximo fechanan pa workshops na The Hub ta: Maart 6 y 20 - April 10 y 24 - Mei 8 y 22 - Juni 5 , 19, 26 - Juli 1 y 3



Minister Wever a termina ta deseando tur participante hopi exito den nan trayectoria empresarial. 



E ESTUDIO DI SPORT AND EVENT MANAGEMENT RIBA NIVEL DI MASTER LO EKIPIA E PARTICIPANTENAN CU HERMENT NECESARIO PA ORGANISA EVENTONAN DEPORTIVO EXITOSAMENTE

Durante Conferencia di Prensa di Gobierno di Aruba, dr. Robin di Pietro, kende ta profesor di University of South Carolina (USC) a elabora di e estudio di Sport and Event Management. E iniciativa ta un colaboracion entre University of South Carolina (USC) y Universidad di Aruba (UA) Facultad di Hospitalidad y Turismo a peticion di Gobierno di Aruba den vision di Minister Endy Croes. E personanan cu completa e estudio aki lo ricibi un certificado y lo por yuda e federacionnan deportivo organisa diferente proyecto di turismo deportivo (sport tourism) aki na Aruba. E meta ta pa provee



conocemento mas amplio y specifico di deporte y evento como negoshi. E programa di Sport Management di USC ta number 1 na Merca. Lo trata cinco (5) modulo den e programa cual ta:

1. Managing Part-Time Volunteers and Employees (maneho di boluntario - y empleadonan "part-time").
2. The Business of Sport (Management and Organization) / e negoshi di deporte (maneho y organisacion).
3. Introduction to Event and Venue Management (maneho di facilidad y evento).
4. Sport and Event Marketing (mercadeo di deporte y evento).
5. The Finance of Sport Event Management (maneho di financiamiento di deporte y evento).

E principio y practica cu lo cubri den e sesionnan lo ekipa e participantenan cu e herment necesario pa planea, organisa,

mercadea, crea fondo y opera evento deportivo na Aruba. E profesornan di USC tin amplio conocimiento academico y experiencia practico cu lo duna e participantenan un "roadmap" pa planea, implementa y evalua eventonan exitosamente. Dr. di Pietro a expresa di ta orguyoso y a gradici Minister Endy Croes pa su vision y e oportunidad.

Por ultimo, Sra. Jo-Anne Croes a expresa cu e ta sumamente orguyoso y honra cu e colaboracion aki cu ta existi pa diescincu (15) aña caba entre University of South Carolina y Universidad di Aruba. Tambe, Sra. Croes a indica cu tin hopi federacion cu tin e gana y pasion pa organisa eventonan internacional, pero no tin e conocimiento. Universidad di Aruba ta sumamente entusiasmo cu e iniciativa aki y ta spera di bolbe ripiti e proyecto aki den futuro. Mirando e acogida inicial di e noticia lo evalua despues di e proyecto piloto aki, si por ripiti of establece e programa como parti di e curiculo na Universidad di Aruba.

MINISTER ENDY CROES A ACUDI NA E APERTURA OFICIAL DI CAMPEONATO REGULAR DI ARUBA LITTLE LEAGUE 2024

Exito na tur ekipo!



Diadomingo mainta, na Stadion Nadi Croes Crismo Angela a tuma lug a di 66 apertura di campeonato regular di Aruba Little League 2024. E ceremonia a inicia cu desfile di e teamnan acompaña pa drumband di Grupo Scout Monseñor Oscar Romero y Grupo Scout St. Hyacinthus. Alrededor di 500 hoben di 5 te cu 16 aña ta participa den e campeonato aki. E aña aki e campeonato ta dedica na Sr. Serio Romney, kende a fungi pa hopi aña como presidente di Aruba South Little League y a traha casi 20 aña como boluntario pa yuda e deporte di baseball. Minister Endy Croes tabata presente na e mainta ameno aki, unda el a hiba palabra y a desea e hungadonan exito. Deporte ta e vehiculo cu ta trece hende hunto, uni un pueblo, crea amistad y ta forma un miho ser humano pa nos sociedad. Pa duna inicio oficial na e campeonato Minister Endy Croes a lansa e prome bala, Sr. Pierre Rafini di RBC Bank a fungi como catcher y Sr. Serio Romney tabata na bate.

Pa finalisa, Minister Endy Croes a expresa cu ta yen'e di satisfaccion pa mira asina hopi mayor y mucha riba veld, paso ta un veld cu a traha hopi riba dje. Esaki ta inspir'e pa sigui inverti den infraestructura deportivo pa brinda mas oportunidad pa e muchanan por practica deporte. Tambe, pa sigui inverti den e federacionnan pa keda etala e nivel deportivo aki na Aruba. Minister Endy Croes ta gradici RBC Bank, boluntario-, umpire-, coach- y mayornan cu ta yuda y brinda oportunidad na nos muchanan pa practica nan deporte favorito. Pa conclui, Minister Endy Croes ta desea Aruba Little League y tur ekipo hopi exito. Cu deseo, dedicacion, determinacion y disciplina ta logra!



Prome Minister Evelyn Wever-Croes:

ENCUESTA DI CBS: INCLUSION DI HENDE MUHE NA ARUBA

"Bo bos ta conta, bo perspectiva y opinion ta conta"

Dia 8 di maart, mundialmente ta celebra Dia Internacional di Hende Muhe. Un dia cu tanto e hende muhe como e hende homber ta uni pa celebra e forza y e resiliencia impresionante di hende muhe y ta duna reconocimiento na hende muhe pa e logronan obteni den tur aspecto, entre otro den economia, cultura y politica. E hende muhe Arubiano tambe dia pa dia ta progresando den tur aspecto, algun den stapnan grandi y otronan den stapnan menos grandi. Inclusion di hende muhe den nos comunidad ta hopi importante pa hiba nos pais den e bon rumbo.

Central Bureau of Statistics (CBS) recientemente a lansa e encuesta tocante e inclusion di hende muhe den e comunidad di Aruba. E encuesta ta consisti di preguntanan tocante con hopi hende muhe ta wordo inclui riba diferente tereno den nos comunidad.

Prome Minister Evelyn Wever-Croes ta encurasha tur hende muhe, jong y adulto, y tambe hende homber, pa participa den e encuesta aki tocante inclusion. Bo bos ta conta, bo perspectiva y opinion ta conta. Participando na e encuesta, no solamente bo ta comparti bo pensamiento, pero tambe bo ta haya oportunidad pa ta parti di e cambio cu bo ta desea di mira na nos pais. Cada reaccion di nos comunidad, ta un paso padilanti pa un Aruba mas diverso y inclusivo, cu muhe y hombernan expresando nan potencial sin limite.

E encuesta aki por wordo completa via e siguiente link:

<https://www.dooblocawi.com/client/Survey.aspx?Ticket=AJ9T84HG>

cu lo ta obtenibel tambe riba pagina di Facebook di Gabinete Wever-Croes.

ENCUESTA

INCLUSION DI HENDE MUHE NA ARUBA



**International
Women's Day**



Gabinete Wever - Croes II

CELEBRACION

DIA INTERNACIONAL
PA HENDE MUHE



ACION

TOPICO

INSPIRA
INCLUSION
DI HENDE MUHE

FECHA

8 DI MAART, 2024

ORARIO

8:00 AM - 12:00 PM

LUGA


RENAISSANCE CONVENTION
CENTER

PA REGISTRA



Gabinete Wever-Croes

Cu e fundeshi di cada
inspiracion propio pa ta inclui,
e hende muhe ta sinti nan mes
empodera, motiva, eleva y importante.
Cada hende muhe cu ta inspira,
ta reconoce oportunidadnan
pa inspira otronan pa ta inclui.



Arte di Muraya na San Nicolas no ta simplemente
verf riba bloki. E creatividad, fantasia y color riba e
murayanan ta un fuente di inspiracion di artistanan
pa encurasha nos pa brasa e poder di creatividad y
colaboracion na nos barionan di Aruba.

2024

AÑA DI STABILIDAD Y PROSPERIDAD